

بِسْمِ اللّٰهِ الرَّحْمٰنِ الرَّحِیْمِ
نَحْمَدُهٗ وَنُصَلِّیْ عَلٰی رَسُوْلِهِ الْکَرِیْمِ

সংক্ষিপ্তসার খুতবা জুমআ

উহুদের যুদ্ধের বর্ণনা
এবং ফিলিস্তিনের জন্য দোয়ার আহ্বান

সৈয়দনা হযরত আমীরুল মুমিনীন হযরত মির্যা মাসরুর আহমদ খলিফাতুল মসীহ আল্ খামেস আইয়াদাুল্লাহ্ তাআলা বেনাস্রিহিল আযিয কর্তৃক ১৯ জানুয়ারী, ২০২৪ ইং তারিখে যুক্তরাজ্যের (টিলফোর্ড) ইসলামাবাদের মসজিদে মুবারকে প্রদত্ত খুতবা জুমআর সংক্ষিপ্তসার

আশ্হাদু আল্লাহ্ ইলাহা ইল্লাল্লাহু ওয়াহ্দাহু লাশারীকালাহু, ওয়াশ্হাদু আনা মুহাম্মাদান আবদুহু ওয়ারসূলুহু।
আম্মাবাদু ফা-আউযুবিল্লাহি মিনাশ শয়তানির রজিম, বিসমিল্লাহির রহমানির রহিম। আল্হামদু লিল্লাহি
রব্বিল ‘আলামিন। আর রহমানির রহিম। মালিকি ইয়াওমিদ্দিন। ইয়্যাকা না’বুদু ওয়া ইয়্যাকা নাস্তাজ্জিন।
ইহদিনাস সিরাত্বাল মুসতাক্বীম। সিরাত্বাল লায়ীনা আনআ’মতা আ’লাইহিম। গায়রিল মাগদূবি ‘আলায়হিম।
ওয়ালাদদল্লীন।

তাশাহুদ, তা’উয ও সূরা ফাতিহা পাঠের পর সৈয়দনা হুযুর আনোয়ার (আই.) বলেনঃ

উহুদের যুদ্ধের প্রেক্ষাপটে আরো কিছু ঘটনা বর্ণনা করব। যেমনটি বলা হয়েছিল, শত্রুরা এ ঘোষণা দিয়েছিল যে, মুহাম্মদ (সা.) নিহত হয়েছেন। মুসলমানরা যখন একথা শোনে তখন তাদের অবস্থা কি হয়েছিল সে সম্পর্কে উল্লেখ আছে, ইবনে কামিয়া যখন এ ধারণা করে যে, সে মুহাম্মদ (সা.)-কে হত্যা করেছে, তখন সে ঘোষণা করে যে, মুহাম্মাদ সল্লাল্লাহু আলাইহি ওয়াসাল্লাম শহীদ হয়েছেন। এটাও বলা হয় যে ঘোষণাকারী ছিল একজন শয়তান। যদিও ঘোষণাকারী কে ছিল এ সম্পর্কে বিভিন্ন বর্ণনায় মতবিরোধ রয়েছে। এটা সম্ভব যে বিভিন্ন লোক এই ঘোষণা দিয়েছে, শয়তান প্রকৃতির কিছু লোকও এই ঘোষণা দিতে পারে।

হযরত মির্যা বশীর আহমদ সাহেব (রা.) এ সম্পর্কে লিখেছেন, মহানবী (সা.)-এর মৃত্যুর সংবাদ শুনে মুসলমানরা তিন ভাগে বিভক্ত হয়ে গিয়েছিল। প্রথমত, কিছুমুসলমান এ সংবাদ শুনে যুদ্ধক্ষেত্র থেকে পালিয়ে মদীনায় ফেরত চলে গিয়েছিল। তখনকার পরিস্থিতি এবং লোকদের হৃদয়ের অবস্থা অনুসারে আল্লাহ তা’লা তাদেরকে ক্ষমা করে দিয়েছেন বলে কুরআনে উল্লেখ আছে। তবে তাদের মদীনায় যাওয়ার ফলে সেখানেও অস্বস্তিকর পরিস্থিতির সৃষ্টি হয় এবং লোকেরা দলে দলে উহুদের প্রাপ্তর অভিমুখে ছুটে

আসতে থাকে। দ্বিতীয় দল হলো তারা, যারা মহানবী (সা.)-এর শাহাদতের সংবাদ পেয়ে কোনো কিছু করাকে অনর্থক মনে করে হতোদ্যম হয়ে বসে পড়েছিল। তৃতীয়ত সেই দল, যারা সংখ্যায় সবচেয়ে বেশি ছিল এবং অনবরত যুদ্ধ করে যাচ্ছিল। আর তাদের একটি অংশ মহানবী (সা.)-এর চারপাশে সমবেত হয়ে লড়াই চালিয়ে যাচ্ছিল, কিন্তু শত্রুদের উপর্যুপরি আক্রমণের কারণে বারংবার তারা বিচ্ছিন্ন ও বিক্ষিপ্ত হয়ে পড়ছিল, তবে সুযোগ পেতেই আবার মহানবী (সা.)-এর চতুর্পার্শ্বে সমবেত হচ্ছিল।

এ সময় উতবা বিন আবী ওয়াক্কাসের নিক্ষিপ্ত পাথর লেগে মহানবী (সা.)-এর একটি দাঁত শহীদ হয়ে গিয়েছিল। এরপর আব্দুল্লাহ্ বিন শিহাবের নিক্ষিপ্ত পাথর তাঁর কপালে আঘাত করে। এর ক্ষণিক পরেই ইবনে কামিয়ার নিক্ষিপ্ত পাথর মহানবী (সা.)-এর গালে আঘাত করে যার ফলে তাঁর শিরস্ত্রাণের দুটি আংটা তাঁর গালে বিদ্ধ হয়ে যায়।

যাহোক, হযরত আবু উবায়দা (রা.) সর্বপ্রথম মহানবী (সা.)-এর উজ্জ্বল দু'নয়ন দেখে তাঁকে শনাক্ত করতে পারেন যে, তিনি (সা.) জীবিত আছেন। তখন তিনি যতটা সম্ভব উচ্চস্বরে চিৎকার করে বলেন, ‘হে মুসলমানরা আনন্দিত হও! মহানবী (সা.) জীবিত আছেন’। আরেক বর্ণনানুযায়ী, হযরত কা'ব বিন মালেক (রা.) তাঁকে প্রথমে দেখে এ ঘোষণা করেছিলেন। যাহোক, মহানবী (সা.)-এর জীবিত থাকার সংবাদ পেয়ে সাহাবীরা পুনরায় তাঁর চতুর্পার্শ্বে সমবেত হতে থাকেন। অতঃপর মহানবী (সা.) সাহাবীদের নিয়ে নিরাপদে একটি ঘাঁটির উদ্দেশ্যে অগ্রসর হন। আর এভাবেই তিনি (সা.) যুদ্ধের মোড় ঘুরে যাওয়ার পর চরম ভয়াবহ পরিস্থিতিতেও একজন নিপুণ যোদ্ধার মতো নিজের সাহাবীদের প্রাণ রক্ষা করতে এবং কাফিরদের মনোবাসনা ব্যর্থ করতে সক্ষম হন।

পাশ্চাত্যে মক্কার এক নেতা উবাই বিন খাল্ফ মহানবী (সা.)-এর ওপর আক্রমণ করতে চেয়েছিল। সে বলেছিল, যদি মুহাম্মদ (সা.) বেঁচে যায় তাহলে আমার রক্ষা নাই। আরেক বর্ণনানুযায়ী সে একটি ছোড়ায় আরোহণ করে বলে, আমি এর ওপরে আরোহিত অবস্থায় মুহাম্মদ (সা.)-কে হত্যা করব। প্রথমে সাহাবীরা তাকে প্রতিহত করতে চান, কিন্তু মহানবী (সা.) বলেন, না। আমিই তাকে হত্যা করব। এরপর যখন সে নিকটে আসে তখন মহানবী (সা.) স্বয়ং তাকে বর্শা দ্বারা আঘাত করেন যার ফলে সে মাটিতে পড়ে যায়। সেখান থেকে উঠে চিৎকার করতে করতে সে পালিয়ে যায়। যদিও সে তৎক্ষণাৎ মারা যায়নি, কিন্তু মক্কা পৌঁছানোর পূর্বেই সে প্রাণের মায়া ত্যাগ করে।

মহানবী (সা.) পাহাড়ের চূড়ায় আরোহণের পর দেখেন, হঠাৎ কুরাইশের একটি দল ওপরে উঠে আসছে। তাদেরকে দেখে তিনি (সা.) দোয়া করেন, ‘হে আল্লাহ্! আমাদের ওপর তারা বিজয়ী হতে পারে না। হে আল্লাহ্! আমাদের শক্তি ও সামর্থ্য নেই, কেবল তোমার ওপরই আমরা ভরসা করি।’ এরপর হযরত উমর (রা.) একটি সৈন্যদল নিয়ে কাফিরদের বিরুদ্ধে দণ্ডায়মান হন এবং তাদেরকে পিছু হটতে বাধ্য করেন।

একটি বর্ণনায় আছে, মহানবী (সা.)-এর পবিত্র মুখমণ্ডলে আঘাতের কারণে রক্ত ঝরছিল এবং তিনি

নিজেও দুটি বর্ম পরিধান করে রেখেছিলেন, তাই পাহাড়ের চূড়ায় আরোহণের সময় দুর্বলতা ও বর্মের ওজনের কারণে তিনি পড়ে যাচ্ছিলেন। এটি দেখে হযরত তালহা (রা.) তাঁকে নিজের কাঁধে বহন করে ওপরে তুলে দেন। তখন মহানবী (সা.) বলেন, ‘তালহার জন্য জান্নাত নির্ধারিত হয়ে গেছে’। হযরত আয়েশা (রা.) বলেন, হযরত আবু বকর (রা.) উহুদের স্মৃতিচারণ করে বলতেন, সেই দিনটি সম্পূর্ণরূপেই তালহার দিন ছিল।

মহানবী (সা.)-এর গাল থেকে শিরস্রাণের আংটা বের করার বিষয়ে বর্ণিত হয়েছে, মহানবী (সা.)-এর চেহারার যেন কোনো ক্ষতি না হয় সেজন্য হযরত আবু উবায়দা (রা.) নিজের হাত দ্বারা সেটি টেনে বের করতে চাননি, বরং নিজের দাঁত দিয়ে সেটি টেনে বের করার চেষ্টা করেন। এটি দেখে আবু বকর (রা.) আফসোস করে বলেন, হায়! আমি কেন তার স্থলে ছিলাম না। আবু উবায়দা (রা.) দাঁত দিয়ে আংটা টেনে বের করতে গেলে দু'বারে তার দুটি দাঁত খুলে পড়ে যায়, অথচ বর্ণিত হয়েছে, সম্মুখের বা কর্তন দাঁতবিহীন লোকদের মাঝে তিনিই সবচেয়ে সুদর্শন পুরুষ ছিলেন।

এরপর মহানবী (সা.)-এর প্রাথমিক চিকিৎসা করা হয়। তিনি সারা দেহে সত্তরটি আঘাত পেয়েছিলেন। তিনি এতটা আহত হয়েছিলেন যে, আঘাতের স্থানগুলো থেকে অনবরত রক্ত ঝরছিল। তিনি (সা.) প্রথমে নিজেই ক্ষতস্থান থেকে রক্ত মুছছিলেন আর আফসোস করে বলছিলেন, ‘সেই জাতি কীভাবে সফল হতে পারে যারা তাদের নবীকে আহত করেছে এবং তাঁর রুবাই তথা কর্তন দাঁত ভেঙ্গে দিয়েছে অথচ তিনি তাদেরকে খোদার দিকে আহ্বান করেন।’ বুখারী শরীফে বর্ণিত হয়েছে, হযরত ফাতেমা (রা.) মহানবী (সা.)-এর আঘাতপ্রাপ্ত স্থান ধুয়ে দিচ্ছিলেন আর হযরত আলী (রা.) সেখানে পানি এনে ঢেলে দিচ্ছিলেন। কিন্তু রক্ত প্রবাহ বন্ধ হচ্ছে না দেখে হযরত ফাতেমা (রা.) বস্তার একটি টুকরো পুড়িয়ে তা ক্ষতস্থানে লাগিয়ে দেন যার ফলে রক্ত পড়া বন্ধ হয়ে যায়। সে সময় মহানবী (সা.)-এর প্রচণ্ড তৃষ্ণা লাগলে হযরত মুহাম্মদ বিন মাসলামা (রা.) নিকটবর্তী একটি ঝর্ণা থেকে তাঁর জন্য সুপেয় পানি নিয়ে আসেন এবং তিনি তা থেকে পান করেন। এরপর মহানবী (সা.) তার জন্য দোয়া করেন। হুযূর (আই.) বলেন, এই বর্ণনার ধারা আগামীতেও অব্যাহত থাকবে ইনশাআল্লাহ।

হুযূর (আই.) বলেন, আমি ফিলিস্তিনিদের জন্য ধারাবাহিকভাবে দোয়ার প্রতি মনোযোগ আকর্ষণ করছি। এখন তো মুসলমানরা ঐক্যবদ্ধ হয়ে ফিলিস্তিনিদের বাঁচানোর পরিবর্তে নিজেরাই যুদ্ধে লিপ্ত হচ্ছে। পাকিস্তান ও ইরান পরস্পর যুদ্ধ করছে, পরস্পর পরস্পরের ওপর বোমা নিক্ষেপ করছে। এর ফলে অবস্থা আরো অবনতির দিকে যাচ্ছে। আল্লাহ তা'লা প্রকৃত অর্থে তাদেরকে নিজেদের লক্ষ্য অনুধাবনের তৌফিক দিন এবং আল্লাহ করুন, মুসলমানরা যেন এক উম্মতে পরিণত হতে সক্ষম হয়।

পরিশেষে হুযূর (আই.) সৈয়দ মওলুদ আহমদ সাহেবের স্মৃতিচারণ করেন যিনি সৈয়দ দাউদ মুজাফফর শাহ সাহেবের পুত্র ছিলেন এবং সম্প্রতি ৭৬ বছর বয়সে ইন্তেকাল করেন। ইন্না লিল্লাহে ওয়া ইন্না ইলায়হি রাজেউন। তিনি হযরত মুসলেহ মাওউদ (রা.) এবং সৈয়দা উম্মে তাহের সাহেবার দৌহিত্র ছিলেন।

এরপর হুযূর বুরকিনা ফাসোর ডোরি রিজিওনের মাহদীয়াবাদ জামাতের প্রেসিডেন্ট মুকাররম আকমীদ আগ মুহাম্মদ সাহেবের স্মৃতিচারণ করেন, যিনি সম্প্রতি ৬৫ বছর বয়সে ইন্তেকাল করেছেন। ইন্না লিল্লাহে ওয়া ইন্না ইলায়হি রাজেউন। হুযূর আনোয়ার (আই.) তাদের রুহের মাগফিরাত ও শান্তি কামনা করে দোয়া করেন এবং জুমুআর নামাযের পর প্রয়াতদের গায়েবানা জানাযা পড়ানোর ঘোষণা প্রদান করেন।

আল্‌হামদুলিল্লাহি নাহ্মাদুহু ওয়া নাসতায়ীনুহু ওয়া নাসতাগ্‌ফিরুহু ওয়া নু'মিনুবিহী ওয়া নাতাওয়াক্কালু আলাইহি ওয়া না'উযুবিল্লাহি মিন শুরুরি আনফুসিনা ওয়া মিন সায়্যিয়াতি আ'মালিনা-মাইয়্যাহ্‌দিহিল্লাহু ফালা মুযিল্লালাহু ওয়া মাই ইউয্লিলহু ফালা হাদিয়ালাহু-ওয়া নাশহাদু আল্লা ইলাহা ইল্লাল্লাহু ওয়াহ্দাহু লা শারীকালাহু ওয়ানাশহাদু আন্না মুহাম্মাদান আবদুহু ওয়া রাসূলুহু-

‘ইবাদাল্লাহি রাহিমাকুমুল্লাহু-ইন্নালাহা ইয়া’মুরু বিল ‘আদলি ওয়াল ইহসানি ওয়া ঈ‘তাইযিল কুরবা ওয়া ইয়ানহা ‘আনিল ফাহ্‌শাই ওয়াল মুনকারি ওয়াল বাগ্‌ই-ইয়াইযুকুম লা’আল্লাকুম তাযাক্করুন। উযকুরুল্লাহা ইয়াযকুরুকুম ওয়াদ’উহু ইয়াসতাজিবলাকুম ওয়ালা যিক্‌রুল্লাহি আকবর।

(‘মজলিশ আনসারুল্লাহ ভারত’ কর্তৃক প্রকাশিত সংক্ষিপ্ত উর্দু খুতবার অনুবাদ)

Bengali Khulasa Khutba Juma Huzoor Anwar ^(at) 19 January 2024 Distributed by	To,	
Ahmadiyya Muslim MissionP.O..... Distt.....Pin.....W.B		
বিশদে জানতে : Toll Free No.1800 103 2131 www.alislam.org www.mta.tv www.ahmadiyyamuslimjamaat.in		

Summary of Friday Sermon, 19 January 2024, Bengali 4/4; Translated by Bangla Desk Qadian